

Date – 28/03/2024
Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Mizoram Lok Sabha inthlan April ni 19-a vote thlak turah nimin khan MNF, Congress leh BJP Candidate-te'n chuh turin hming an pe lut.**
- 2. Chakma Autonomous District Council (CADC) sorkarah Parva bialtu MDC, Mohan Chakma chu Chairman atan chuhtu awm lovin nimin khan tlinga puan a ni.**
- 3. MPSC-in kumin February ni 1-a result a tihchhuah tak Combined Competitive Examinations kalpui danah thil fel tawk lo leh chhui chian ngai thil a awma an hriat thu MZP in an sawi.**
- 4. Delhi Chief Minister Arvind Kejriwal-a man a nih chungchanga US State Department thupuangtuin thu leh hla a lo nei ve chu a lawm loh thu India chuan a sawi.**

<><><>

MNF, CONG. & BJP CANDIDATES FILES NOMINATION

Mizoram Lok Sabha inthlan April ni 19-a vote thlak turah nimin khan Mizo National Front (MNF) Candidate Pu K. Vanlalvena, Congress Candidate Pu Lalbiakzama leh BJP Candidate Pu Vanlalhmuaka te'n chuh turin hming an pe lut.

Nimin kha Candidate-te nomination theh luh hun tawp ni a ni a; ZPM Candidate Richard Vanlalmangaiha, PC Party Candidate Pi Rita Malsawmi leh Independent Candidate Pu Lalhriatrenga Chhangte ten hming an lo pe lut tawh a ni.

Nomination file zawhah chanchinbu mite zawhna chhangin MNF Candidate Pu K. Vanlalvena chuan ram, hnam leh sakhua a him theihna turin nasa zawka tan lak a tum dawn thu a sawi a. Tun parliament kal mekah a chung leh pawnah nasa taka au a tul avangin hetiang a thei tur hian Lok Sabha MP seat chu a chuh a ni, a ti a. Rajya Sabha MP a nih laia a hnathawh

en chungin Mizoram mipuiten vote thlak se a duh tih sawiin Mizoram mamawh chhhanna ni dawna a inhriat vangin a ding chhuak tih a sawi.

NDA lama a thut tur chungchang sawiin Pu K. Vanlalvena chuan hei hian Mizo mipuitea vote an zawna kawngah nghawng a neih a rin loh thu a sawi a. NDA lam thu tur BJP President Pu Vanlalhmuaka pawh a hranin an ding ve tho tih sawiin NDA chu party 45 inzawmkhawm an ni, a ti a. Kristian state Nagaland leh Meghalaya-ah NDA thawhpui an sawrkar mek tih sawiin NDA chhung ngeiah BJP thil tha lo tih duh lotu tam tak an awm a ti a; pawn lam atanga do aia chhung lam atanga do a tha zawk tih hrechiantu a ni tih a sawi bawk.

Congress Candidate Pu Lalbiakzama chuan sakhaw zalenna bo ta leh hnam hnufual leh tenau zawkte palzutna tam lutuk tibo tura hmalak a tum thu a sawi a; Party ang pawhin an beiseina a sang hle tih sawiin BJP-in UCC pass an tum chu Mizoram tan a him lo a, India khua leh tui zang zawng an intluktlan nan theihtawpa bei turin a ding chhuak a ni, a ti.

BJP MP Candidate Pu Vanlalhmuaka chuan kumin Lok Sabha MP inthlanpuia BJP Mizoram thupui chu ‘a hmasa berah Mizoram’ a ni, a ti a. Hmarchhak state 7 zinga state 4 te chuan Central Minister an nei tawh a. Mizoram, Meghalaya leh Nagaland chu a nei lo an nih avangin Mizoramin BJP MP a nei a nih chuan Cabinet Minister a nih theih thu a sawi a. MP-a thlan tlin a nih chuan hmasawna chu Mizoram chhungah mamawh a nihna anga pek a nih tur thu te, BJP-ah duhsak bik awm lovin state mamawh ang zela hmasawna pek thin a ni, a ti a. NDA-ah pahnih thru an awm loh bakah BJP chu NDA neitu a ni a, BJP Mizoram awmchhan chu Mizo hnam leh sakhua himna atan a ni, a ti.

<><><>

NEW CADDC CHAIRMAN

Chakma Autonomous District Council (CADDC) sorkarah Parva bialtu MDC, Mohan Chakma chu Chairman atan chuhtu awm lovin nimin khan tlinga puan a ni.

CADC Chairman hmun hi nikum December ni 15-a Chairman ni lai Kali Kumar Tongchangya-a a ban avangin a ruak a. Governor-in CADDC Chairman thlan a tul thu hi tun thla ni 21 khan a puang a, hemi bawhzui hian CADDC Dy. Chairman-in inthlan huh tumte tana hming pek luh hun te puangin hun hawn chhung hian Parva bialtu Mohan Chakma bak hming pe lut an awm loh avangin vawiin khan tlinga puan a ni ta a ni.

Thlan tlin a nih hnua a thu sawiah CADDC Chairman thar chuan house leader leh member-te chungah lawmthu a sawi a. Tuna Executive Committee a rin tawk thu leh House kaihhruai kawngah thu lai la taka thil a tih tur thu a sawi a ni.

House leader CADDC CEM leh MLA ni kawp Rasik Mohan Chakma chuaun Chairman thar a lawmpui thu leh House rorel kaihhruai kawnga a dinhmun pawimawh zia te a sawi a ni.

<><><>

MZP ON MPSC

Mizoram Public Service Commission (MPSC)-in kumin February ni 1-a result a tihchhuah tak Combined Competitive Examinations kalpui danah thil fel tawk lo leh chhui chian ngai thil a awma an hriat MZP in an sawi.

Hemi chungchang hi nimin khan thuchhuah siama sawiin MZP chuan, Mizoram-a hna sang leh zahawm tak tak latu MPSC chhûngah hetiang thil hriat tur a awm hi pawl an ti takzet, an ti a. Mizorama hna sang leh zahawm tak takte lak hna, MPSC-in rintlak taka rei tak a kalpui chu lawmawm an tih thu sawiin MZP chuan, thalai hna zawng mekte pawhin an ringtawk hle thin a. Hetih lai hian Combined Competitive Examination kalpui hnuhnung berah dik tawk lova hmalakna awm ngeia a hria chu an ngai thutak hle, an ti a. Ngunthluk zawka zir chianga MPSC chu thalai hna zawng mekten an rin ngam zel theihna turin a tawp thlengin hma an la zel dawn, an ti.

MZP chuan tun hnaiah NIT Mizoram Asst. Registrar leh AMC hnuah hna lakah a buaipuituten an laina hnai duhsak zawngte thun an tum avangin hma an la tih an thuchhuahah chuan tarlangin he ti ang thil MPSC-a a lo awm ve leh zel chu pawl an ti takzet a ni, an ti.

<><><>

STATE MEDIA CELL FOR LOK SABHA GENERAL ELECTION, 2024

Thla thar April ni 19-a Lok Sabha inthlanpui vote thlak hunah vote tla a tam theih nana hmalak dan tur sawihona State Media Cell for Lok Sabha General Election, 2024 chuan nimin khan DIPR Conference Hall, Lianchhiari Run-ah inrawnkhawmna hun a buatsaih a. Kohhran hrang hrang thalai hruaitute, Tlawmngai Pawl hrang hrang hruaitute, Mizo Zirlai Pawl hruaitute bakah hnam bil zirlai pawl hrang hrang aiawhte an tel.

Inrawnkhawmna hun hi Mizoram Addl. Chief Electoral Officer, Dr. H. Lianzela'n a kaihruai a. Mizoramah chuan Lok Sabha MP thlanna aiin MLA thlannaah vote tla a tam sang fal hle thin tih sawiin, MLA thlannaah India rama vote thlak tha ber te zinga mi a nih laiin a hnu lawk thla 4 vel leka Lok Sabha MP thlanah ram puma vote tla chawhrual Mizoramin a pha thei ngai meuh lo va, mipuite a bikin thalaite zingah vote tla a that lehzual theih nan mi tin tanho a tul a, hemi tur hian eng tiangin nge hma lakho a thawhho a nih theih ang tih sawihona hun an ruahman tih a sawi a ni.

He hunah hian Deputy Chief Electoral Officer Pu Henry C. Lalrawnkima leh Addl SP (Crime), Pu Zonun Sanga ten inthlanpui neih tawha Mizoram dinhmun tlangpui leh Dan leh hrai zawm tur pawimawhte an sawifiah a. Hemi hnu hian Addl. CEO kaihhraina hnuah sawiho a ni a; rawtna leh ngaihdan pawimawh tak tak te sawiho a ni a, sawihona êng atang hian hmalakna thar duan tum a ni.

Sawihona hunah hian Mizoram Upa Pawl, Central YMA, Central KTP, Mizoram Thalai Kristian Pawl, Salvation Army Youth, North-East PYD, Mizoram PYD, Adventist Youth Ministries (SDA), Diocese Catholic Thalai Pawl, Mizo Zirlai Pawl, Siamsinpawlpi (Paite Zirlai Pawl), Hmar Students Association, Mizoram Bawm Students Association, Lai Students Association, Mara Students Organisation, Pang Zirlai Pawl, Central Young Chakma Association leh Bru Students Association aiawhte an tel.

<><><>

MJA SIAHA & MCHP HQRS

Siaha MJA hruaitu Aizawla cham mekte chuan Mizoram sorkar dawra kal MCHP Hqrs. hruaitute nizan khan Aizawl Zotlang venga Mara House-ah an kawm a, hriselna leh dam lo enkawl kawnga an an District mamawh hrang hrang Health Minister hnena an thlen chungchanga Minister-in a lo chhan dan te an ngaithla.

MCHP Hqrs. President Pi P.Chaki chuan Health Minister chu Siaha mipui leh pawl hrang hrang aiawha hmu an nih thu leh an harsatna chiang taka an hrih thu sawiin an thu thlen te chu Minister pawhin a lo ngai pawimawh tak zet a, Director râwn nghalin Hnimhlum Doctor indaihlohna nasa tak karah hmanhmawh taka thla ruk chung tal dah rih tura ruahmanna siampui turin thu a râwn nghal a, an beiseina a sang a ni, a ti. Ram tana an thawhna kawngah MJA te tawimawmna an dawn zawng zawngah lawmthu an sawi nghal bawk.

MJA Siaha hruaitute hian Siaha District Hospital-a hnimhlum Doctor an neih loh vanga Siaha District mipui ten harsatna nasa tak an tawk mek leh nau nei tur inzai ringawt pawh a tih theih tak loh avanga mi harsa leh rethei zawk ten nasa taka an tuar mek chu veiawm an tih takzet thu an sawi a ni.

<><><>

CENTRAL GOVT. ON ARVIND KEJRIWAL

Delhi Chief Minister Arvind Kejriwal-a man a nih chungchanga US State Department thupuangtuin thu leh hla a lo nei ve chu a lawm loh thu India chuan a sawi.

Hemi chungchangah hian Ministry of External Affairs chuan thuchhuah siamin, ram chhunga dan hmanga hma lakna chungchang US State Department thupuangtuin a lo sawi ve hi a pawm lo hle tih a tarlang a. Ram hrang hrangte chuan an inthian thatna kawngah ram dang zalenna an zahsak hle tur a ni a, Democracy ramte zingah pheih chuan hei hi a pawimawh leh zual a, chuti a nih loh chuan hun lo kal zel turah hriat reng tur thil tha lo a awm palh a hlauhawm a ni, a ti.

External Affairs Ministry chuan ram chhunga dan hmanga rorelna chu tu thuhnuaiah mah awm lovin a hun takah fel fai takin thutlukna a siam mai thin a, chumi lo sawi bawrhban chu thil fel lo tak a ni, a ti.

US State Department thupuangtu thusawi chungchangah hian sorkar laipui chuan New Delhi-a Deputy Chief of Mission of the US Embassy chu a ko nghe nghe a ni.

<><><>